

九煙先生遺集

九煙先生遺集卷三目錄

古今體詩

題友人幃額

三言

題山水畫冊二首

以下
四言

又題山水畫四首

題海棠白頭翁畫

題周年兄山水便面

題王山長社兄行樂圖

擬謝康樂南樓中望所遲客

以下
五古

夕陽詩

并序

又一絕句

余嘗欲評選古今人詩自葩騷而外釐爲三卷一

曰驚天一日泣鬼一日移人而總名曰詩貫先

以一詩識之

旣爲長歌復繫以一絕句

姑山草堂歌

以下
七古

楚州酒人歌

垂虹橋新漲歌

六月六日登洞庭西山縹緲峯放歌

題尤展成水亭垂釣圖

以下
雜言

自譏壙銘

小半斤謠

并序

得陶仲調年兄書

以下
五律

屢夢與陶仲調同上公車

天台

廣陵梵公僧舍同諸子坐雨得十五咸

社題修禊

贈孫霄客生孫次陳階六同年韻

香花甲和施佩宜

題明秀閣

戲咏泥美人

牡丹蓮

盆蘭

大竿嶺

青浦縣

丹陽舟中夜雪

集杜題宮子春雨草堂二首

游繁昌縣峩山二首

九日於友人處遇凡仙與余輩酬唱甚樂因紀之
和董蔗園十二月讀書樂十二首

游南嶽丹霞寺

以下
七律

平山春望

客中過西湖見吳昌子卞元文詩步韻寫懷

己丑過西湖見吳昌子卞元文詩步韻寫懷

贈簡在雍

僦居

秋日與杜于皇過高座寺登雨花臺

秋日獨登觀象臺故宮及功臣廟一帶遺址

過辰龍關

次韻村居

余自癸丑歲有選詩之序忽忽又數載矣至己未
之春館於岑山程子齋中因從事斯役於是先
成唐詩快十六卷笑咏四首識之

荒寺愁坐同允康賦

九日飲翁季霖草亭

次韻答贈喻非指

題宗定九新柳堂

題劉正少次山樓

賦得月湧大江流

咏牡丹

觀音蓮

官舫卽席贈小姬掌仙

次韻贈澹生女史

友人以瓷鞋杯行酒宛然纖纖一瓣因向座客徵
詩約字字帖切瓷杯不得移入眞鞋座客多闕
筆余漫成六首

九煙先生遺集卷三

湘鄉後

湘潭族

古今體詩

題友人幃額

優哉游榻耶舟醒也夢蜨歟周

題山水畫冊二首

長夏江村草樹色喜我所思兮碧雲千里

此暮秋耶盈眸丹碧山水相涵遠不踰尺詩在漁舫霜

鴻數隻

題山水畫冊四首

秋容半山著樹能響杖藜者誰抱琴安往
此中有詩欲說不似煙樹江帆秋聲滿紙
楓荻皆蒼天失其碧我懷伊人橫江一遂
竹林少五商山去二對酌陶然松篁交翠指顧之間嵐
光欲醉

題海棠白頭翁畫

妃子已醉爛漫春紅何物微禽猶然夢中

題周年兄山水便面

倣雲林筆意

長松參天書屋在下竹樹蕭蕭秋容堪把遠山不藍頭

石非赭室中無人疑遷世者神遊其間意象瀟灑誰歟
爲此浸潭大雅是頽侯耶抑雲林也

題王山長社兄行樂圖

置邱壑中作梅花賦我懷伊人空山歲暮

擬謝康樂南樓中望所遲客

匡坐意不樂慨然登南樓南樓何所見蒼莽送平疇終
古忽與感浩浩千里愁春容豈不媚獨立如高秋穆然
營四海鷗鷹寡匹儔我友皇虞人擁卷悅林邱皎駒信
非邈冥鴻不可求侘傺闌干間抗懷揚清謳瓊瑤如五
嶽桃李愧虛投下視輕薄兒蠕蠕方羣遊

夕陽詩 并序

余生平最愛夕陽嘗欲哀輯古今人詩爲夕陽集凡句中有夕陽字者悉皆採錄若斜陽殘陽夕照返照之類亦附焉并以一詩識之

我聞詩人言夕陽無限意夕陽自夕陽何與詩人事多少
蚩蚩兒昏曉同夢寐獨有多情人煙雲滿胸次所見
皆夕陽夕陽况相值初不與詩期爾時詩自至靈均指
纈黃淵明賦佳氣夕陽本無言詩人自憔悴多情我亦
然見此欲下淚吁嗟一夕陽宇宙相終始碧雲惹相思
明霞澹搖曳芳草恨無休紅樹紛如醉種種與偕來茫

茫百端萃羈客劇傷心美人漫凝睇第一最銷魂無如
雨後霽黯黯近黃昏明滅半蒼翠悲吟織暮蟬殘虹空
點綴銷魂復銷魂尤在秋冬際草木倏變衰悄如天地
閉斷雁與寒鴉點點皆愁思終古此夕陽閱盡人間世
河山送興亡城郭今古異松柏五陵煙樓臺鎖薜荔哀
樂兩無端歌哭都非是所以鍾情人咏歎恒不置長篇
或短篇風謠及頌偈詩但說夕陽便有深妙義或一兩
句佳定帶夕陽字首尾縱參差往往不忍棄問我何爲
然殊不可思議母乃痼癖成韻事等魔祟詩爲夕陽窮
亦爲夕陽貴夕陽爲詩傳或亦爲詩累詩耶夕陽耶是

一還是二若與我爲三共命同根蒂我今盡蒐羅不獨
充巾笥愁以當醇醪病以當藥餌亦可當天公亦可泣
幽魅此集若告成詩人應破涕萬古復千秋夕陽長不
墜

又一絕句

自古詩人愛夕陽夕陽佳句滿縑緗我今收拾懸霄壤
好與天爭日月光

余嘗欲評選古今人詩自葩騷而外釐爲三集一
曰驚天一日泣鬼一日移人而總名曰詩貫先以
一詩識之

天上有詩僊地下有詩鬼人間有詩人三才正鼎峙我
思邃古來到今千萬紀聖賢與英雄袞袞隨流水與日
月爭光如此人有幾相傳三不朽德功言者是德功安
往哉獨其言在耳其言維伊何墳索及經史浩汗稱百
家縱橫到諸子讀之如望洋數之難屈指多少慧業人
嶺嶺埋故紙何物通性情觸耳能興起哀感頑豔均惟
有詩而已詩者本天機別趣非關理風雅共離騷千秋
尊祖彌一辭安能贊捧誦咸唯唯過此首先秦逮至今
日止上下二千年作者多於蠅人言氣運殊升降分隆
庳昔爲粲與醇今爲醜與疵唐以後無詩雖有未足齒

吾意頗不然貞元終復始歲歲有嘉禾時時有名卉悅
目卽嬙施適口卽珍餌諸家非一家眾體非一體選詞
惟選佳擷句惟擷美追貌如追魂擢膚如擢髓但取快
意觀何必拘繩軌俗調與油腔相去幾千里見此太憎
生芟夷同莠稂與其收卑庸毋甯過奇傀驚天天欲傾
泣鬼鬼不死移人將移情琴海詎堪擬尤物一嫣然城
國皆敝屣所以列三科甲乙微分壘大意將母同一貫
義取此我本曠逸人鍾情更無比生有風騷癖吟咏罕
暇晷每欲勒一書藏山復懸市無數古精靈奔命環窗
几一一聽品題權衡如校士我自用法公正無偏倚

既非竟陵鍾亦非濟南李甯侯一人知母爲眾人喜收
得好門生榮樂勝金紫大雅庶可扶狂瀾庶可砥此志
何時酬悵惜飛光駛鼎鼎六十秋貧賤負冠履孤持千
古意誰人喻斯旨屈宋倘復生或者稱知己

既爲長歌復繫以一絕句

千秋大業孰扶輪萬丈文光自有神好把一編傳不朽
驚天泣鬼與移人

此余癸丑冬所咏也初欲名爲詩貫復改爲詩別後
以泗濱戚子緩耳

珏

言遂定名詩快云

九煙自識

姑山草堂歌

大丈夫何不驂龍鸞騎蟠螭東凌滄海坐蓬壺又何不
走蜚廉鞭列缺西陟崑崙瞰桃都安能跼蹐眼前十笏
斗大室獨抱蠹簡窮年兀坐如囚拘世間難遊盡者好
山與好水難見盡者異人與異書百年鼎鼎菌蟪耳積
蘇繫塊空雄圖且莫言五嶽遠且莫言九州殊卽如宛
陵近在家山咫尺地敬亭華陽諸勝安得驅之枕案供
人耳目娛謝眺李白空叫絕愚公移山豈是今之愚忽
有徐子笑而起曰吾學得少文法能使千峯萬壑晨夕
遶吾廬吾家近在姑山麓父老兒孫山與吾眾峯羅立
紛拱揖蒼者如吏翠如姝白雲五里或十里長松千株

更萬株鸞飄鳳泊虎豹蹲好女狀貌神仙居茲山雖小
頗靈闕岫嶮宛委似不如草堂數椽無堊牆青山滿屋
泉流渠風雨欲來恨宿靄雲霧將去還踟躕徐子高臥
恣觴詠醉呼懷葛嘲黃虞朱輪絳幘那敢到籬下下叱
五侯七貴皆羣奴盧鴻終南神智槁杜甫花溪形影癯
何如徐子巖澗樂可遊退谷泛杯湖我更對君發浩想
天下名山非一區峨嵋匡廬競雄灝台蕩九子奇秀俱
君何不結廬於巨靈之掌夸娥之趺象王之鼻玉女之
顱雲海盪其胸魄簾瀑滌其神膚何但規規家山一片
石直欲跨嵩嶽岱吞衡巫徐子大笑公莫迂姑山草堂

天下無噫吁嘻誠如君言姑山草堂天下無

楚州酒人歌

酒人酒人爾從何處來我欲與爾一飲三百杯
寢區斗大不堪容我兩人醉直須上叩閭闔尋蓬萊
我思酒人昔在青天上氣吐長虹光萬丈手援北斗
斟天漿天廚絡繹供奇釀兩輪化作琥珀光白榆
厯厯皆杯盎吸盡銀河烏鵲愁黃姑渴死哀清秋
酒人咄咄渾無賴乘風且訪崑崙邱綠娥深坐槐
眉下萬樹桃花覆樽罍穆滿高歌劉徹吟一見
酒人皆大詫雙成長跪進三觴大嚼絳雪吞元
霜桃花如雨入駿叫春風浩浩心飛揚瑤池

雖樂嶠嶠促阿母倚窗不堪宿願假青鳥探瀛洲列眞
酣飲多如簇天下無不讀書之神仙亦無讀書不飲酒
之神仙神仙酒人化爲一相逢一笑皆陶然陶然此醉
堪千古平原河朔安足數瑤羞瓊廉賤如齋蒼龍可饑
麟可脯興酣瞪目叫怪哉海波清淺不盈杯排雲忽拂
千帝座撞鐘伐鼓轟如雷金莖傾倒沆瀣竭披髮大笑
還歸來是時酒人獨身橫行四天下上天下地如龍馬
百靈奔蹶海嶽翻所向無不披靡者眞宰上訴天帝驚
冠劍廷議集公卿今者酒人有罪罪不赦不殺不可殺
之反成酒人名急勅酒人令斷酒酒人惶恐頓首奏天

庭臣有醉死無醒生帝顧巫陽笑扶酒人去風馳雨驟
蒼黃謫置酒州城酒人墮地頗狡獪讀書學劍皆雄快
白晳鬢鬢三十時戲掇青紫如拾芥生平一飲富春渚
再飲鸚鵡湖手板腰章束縛苦半醒半醉聊枝梧誰知
一朝雲雨忽翻覆酒人發狂大叫還痛哭胸中五嶽自
峨峨眼底九州何蹙蹙頭顱頓改舊生塵酒非酒兮人
非人椎壚破觚吾事畢那計金陵十斛春還顧此時天
醉地醉人皆醉丈夫獨醒空憔悴從來酒國少頑民頌
德稱功等遊戲不如大詔天下酒徒牛飲驚飲囚飲終
日酩酊淋漓嬉笑怒罵聊快意請與酒人構一凌雲爍

日之高堂以堯舜爲酒帝羲農爲酒皇淳于爲酒霸仲
尼爲酒王陶潛李白坐兩廡糟壇餘子蹲其傍門外醉
鄉風拂拂門內酒泉流湯湯幕天席地不知黃虞與晉
魏裸程科跣日飛觴一斗五斗至百斗延年益壽樂未
央請爲爾更召西施歌虞姬舞漸離擊筑禰生搥鼓玉
環飛燕傳觥籌周史秦官奉罍無與爾痛飲三萬六千
觴下視金銀玉帛皆糞土但願酒人一世二世傳無窮
令千秋萬歲酒氏之子孫人人號爾酒盤古酒人聞此
耳熱復顏酡我更仰天嗚嗚感慨多卽今萬事不得意
神仙富貴兩蹉跎酒人酒人當奈何噫吁嘻酒人酒人

當奈何爾且楚舞吾楚歌

垂虹橋新漲歌

亦不必觀錢塘潮亦不必觀廣陵濤但看垂虹五月漲
吳江之水勢何高我來吳江凡幾度時見微波落楓樹
前年始至登長橋垂虹亭子聊縱步是時正值大湧餘
水痕刻畫浸橋柱慮殫爲河蛟龍遊民其魚乎公無渡
今年聞說鳩僝功重復古道濬吳淞長橋側半盡開闢
一碧萬頃青天空蝦蟇蜿蜒五千尺垂虹此日眞垂虹
我聞此語心踴躍恨不飛棹江城角何期文酒有奇緣
羯鼓正逢六月朔高堂讌會遶羣賢星羅霧合霏雲烟

如茶如墨復如火困車龍馬紛駢闐解衣盤礴競舐筆
慘澹經營寂不喧是時義輪正卓午滿座和香風栩栩
忽然頭上墨雲橫狂飈颯颯驅犂雨視融纔收火龍鞭
列缺更佐豐隆鼓詞人拍手酒人歌金鐵鏦鏘百靈舞
我時科跣坐高堂同心之友勸傾觴龜茲卻奏飛龍鳳
絲竹嘈囂夜未央初期讌罷徐觀漲誰知雷雨復震蕩
高堂幾欲化長橋階庭三尺飛鯨浪詰朝徒侶遽言歸
回首垂虹空悵快我嘗作客徧九州洞庭彭蠡幾回遊
比年朝暮泛笠澤莫釐縹緲雨鳬鷗九天雲垂海水立
談笑如乘竹葉舟况復松陵家咫尺乘興何妨便遨遊

直須枚叔觀濤日重看吳江八月秋

六月六日登洞庭西山縹緲峯放歌

噫吁嘻怪事哉洞庭一水三萬六千頃中有兩山磅礴
而崔嵬西山之巔曰縹緲自有此峯登者不知幾萬輩
誰曾六月六日來我來亦非愛觸熱因緣意外真奇絕
梁谿有客乘興遊中宵命棹何勇決曉發膠山夕跨塘
詰朝一葦凌蒼茫火雲燒空風色靜雙櫓咿軋水中央
七十二峯紛出沒日晡始艤西山旁舉頭便見蒲萄綠
頓令煩暑化清涼從茲綠者不一狀千綠萬綠森相望
家家橘柚戶桑麻遊人步步行圖障叟童雞犬寂無喧

別有天地疑巢軒世人不信桃源記誰知此是真桃源
眞桃源人罕見水如垣山如殿神仙窟宅尊羽衲津梁
倦老殺姑蘇城裏人何曾一識西山面我來終是苦驕
陽搜奇討勝空徬徨道逢樵牧爭笑詫何物褊褊走顛
狂一遊林屋洞隔凡幽溼宵如夢再遊石公山劍樓雲
嶂聊躋攀包山好閣環空翠歸雲盤石猶等閒三遊西
湖寺寺外松杉中荷芰其日炎威倍赫曦僕夫蹙蹙何
况瘁入門總拚高枕休王侯相喚不回眸忽聞縹緲在
寺側起舞仍作登山謀各向山僧乞杖笠同遊七人四
人留余與二客賈勇上倏忽便到孤峯頭俯瞰衆山皆

培塿茫茫震澤連天浮東望虎阜西望荆溪南望蒼雲
北望梁溪四顧拍手大叫何不乘風便飛去乃猶戀此
紛紜齷齪區區九點之齊州噫吁嘻怪事哉縹緲峯頭
六月六日來長安貴人渴欲死名車利馬走虺隤余與
二客坐天際罡風颯颯浮雲開披襟散髮那知暑恨不
一飲千百杯三島十洲在何許下視塊蘇真可哀噫吁
嘻怪事哉縹緲峯頭六月六日胡爲來噫吁嘻縹緲峯
頭六月六日胡不來

題尤展成水亭垂釣圖

爾頭賈逵頭爾腹邊韶腹爾腕羲之腕爾足鄭崇足胡

魁跣而岑牟乃袖短而襟禿或以爲太原公子之風或
以爲劣比高士之躅而吾曰不然是其人筆掃千軍胸
函萬斛會奏賦於上林聊剖符於孤竹今則拂衣而歸
田園會心而遊濠濮卧六月之羲皇友千秋之綺角抑
豈獨斯人哉卽其垂綸穉子亦知其爲志和之童而非
潁士之僕

自譏壙銘 一號笑蒼道人

笑蒼乎笑蒼乎爾旣不屑生前之富貴獨不留死後之
文章乎旣不能飛身於碧落獨不當淹夢於黃梁乎而
今竟若此是安得不心傷乎然而爾之英風浩氣甯不

蟠五岳而配三光乎

小半斤謠 并序

某善治生間市肉不得踰四兩名小半斤人遂以小
半斤呼之周九煙星曰此盛德事也因爲長謠紀之

市肉市肉震驚神人乃公終身不飲酒窮年不茹葷今

朝朝爲忽市肉咄咄怪事疇可比倫

解一市肉市肉爰聚

童僕左手提衡右手啓櫝有銅如金有錢如琛把授童

僕不覺掩淚酸心

解二童僕受錢愕眙相視長跪請命市

肉甯幾童曰一斤公怒欲捶僕曰半斤怒猶不已童僕

惶恐莫測公旨

解三匍匐再請聽公何云徐伸四指曰小

半斤小半斤者半斤之半半而又半祿已踰算

四僕乃解

前行公尾其後側身躡足潛伏閤右僕詣肉肆錢付屠手屠方鼓刀公突而前曰我市肉爾爲我添一增再增

肉重於權名小半斤不啻六兩公挾僕歸大喜過望

五解

肉已至家僕欲持去公曰無遽談何容易此肉我當細

區分安得愴惶暴殄等兒戲爲我呼爨婢此肉謹付汝

汝其善煎烹一爲乾豆薦祖考二爲賓客餉師生三爲

君庖饜我口飫我腹我與妻妾子女共咀啗下及汝曹

俱彭亨貓鼠不得竊犬豕不得爭餘瀡滿注缶轆釜須

用戛戛鳴珍重小半斤此肉良非輕

六解

市肉市肉震驚

神人咄咄怪事疇可比倫我聞東海有麒麟麻姑擘脯
世莫陳公之啖肉母乃啖麒麟吁嗟乎小半斤

七我聞解

古有參龍人颺叔潛醢饗夏君公之啖肉母乃膾龍肝

披龍鱗吁嗟乎小半斤

八我聞

天廚內有熊蹯豹胎猩

猩脣惟辟列食羅八珍公之啖肉母乃啖熊蹯豹胎猩

猩脣吁嗟乎小半斤

九解

得陶仲調年兄書

陶生今不死吾道尙嶙峋天地留松柏庖廚赦鳳麟十
年書到喜再世夢回眞歌涕知何日東籬歲月新

屢夢與陶仲調同上公車

陶子胡爲者秋燈入夢頻公車仍紫氣野衲且緇塵七
八年中事三千里外人離騷灘艇哭葉葉似前身

天台

勝蹟天台路移情入杳冥飛泉秋後寺絕壁古時亭榭
葉岸多溼蓮花峯更青白雲吾語汝且向石梁停

廣陵梵公僧舍同諸子坐雨得十五咸

英雄皆抱膝相顧濕青衫夏正訛義歷商霖悞傳嚴驕
人蛙閣閣說鬼燕喃喃怪事當窗見林蕉類遠帆

社題修禊

曲水千年事平山此日觴羣賢猶竹影一國自蘭香姓

字元無垢詩書詎不祥共誰爭沐浴日月照滄浪

贈孫霄客生孫次陳階六同年韻

笑我方求子看君已抱孫高陽文若里通德小同門萬
事足還足一堂尊更尊可知麟鳳種容易見雲昆

香花甲和施佩宜

不識香花甲因君始得名采芳分杜若益壽比青精酒
許淵明釀泉宜陸羽烹從今添本草芝朮有難兄
其種出洞庭山中

題明秀閣

如何岳壑裏高義有斯人杵臼疑臯廡詩書想孟隣望

中山共水意外主兼賓以此兼酣暢真堪創葛巾

戲咏泥美人

粉黛眞黃土居然號美人息媯無語日邢媛獨來身暮
雨行應怯春風罵豈瞋怪他心似石蛾翠亦長顰

牡丹蓮

花形叢簇如牡丹房中皆吐碎
瓣俗呼千葉蓮一名臺閣蓮

誰知姚魏國移向水中央芍藥輸新譜芙蓉愧晚粧心
空能吐豔蕙苦亦成香富貴兼仙佛何從著六郎

盆蘭

本自生幽谷何由傍短籬玉階思謝遏綺石愛王維徵
夢深聞近親賢靜室宜莫嫌香國小九畹在披帷

大竿嶺

越閩分界

幾年懷越地此日別閩天
恰過秋冬際重來風雨邊
津梁疲未足性命亂仍全
吾道應何往憑高意惘然

青浦縣

青浦誰家縣無聊試一過
魚蝦臨水賤鸛鶴入城多
所見風猶樸微聞政不苛
欲探峯泖勝百里半桑波

丹陽舟中夜雪

茲宵天果雪雲雨釀多時
氣肅神先告魂清夢不知
布衣寒自笑塵鏡曉頻疑
閒盼雲陽道公車正陸離

集杜題宮子春雨草堂二首

幽事供高臥山林引興長柴扉臨水碓花嶼讀書牀
霧寒高牖春星帶草堂看君多道氣白日到羲皇
蕭瑟唐虞遠桃源自可尋封侯意疏闊在野與清深柳
影含雲幕泉聲帶玉琴忘機對芳草秀氣豁煩襟

遊繁昌縣嵯峨山二首

山有金嵯峨
俗呼仙人洞

未必神仙住如斯洞亦佳危崖疑華嶽怪石可蕭齋
李白遊難到劉伶死欲埋桃花遮道笑此客本天涯

去郭無三里偷閒試一登石雲流片片山翠落層層陸

地瞿唐峽平疇夏禹陵何年重秉炬探穴看飛騰

山閒有石

如疊浪錫山九竒題日石雲
洞深可十餘丈非然炬莫入

九日於友人處遇乩仙與余輩唱和甚樂因紀之
東海揚塵日南山好道年人閒宜說鬼身隱只歸仙龍
鶴三秋駕龜魚半夜箋窮愁良得意爛醉菊花天

和董蔗園十二月讀書樂十二首

正月

椒酒纔稱頌草堂俄寄詩發樽因諫史奪席爲經師雨
潤枯毫茁風和凍硯漸擁書同獺祭莫笑義山癡

二月

大地桃花笑披帷面面香山川爭錦繡雷電啓文章元
鳥初窺案倉庚乍囀簧詞壇多鼓吹誰識社翁忙

三月

新桐初引處生意滿庭蕪
虹見天邊賦萍開水上圖
流觴仍諷詠禁火亦晬晤
讀易閒窗下何心出舞雩

四月

春歸何太急孟夏遂陶陶
櫻筍堪充供蒲葵未告勞
薰風宜拂席永日勝焚膏
麥秀清和候儒生且布袍

五月

有書那不讀反舌恥無聲
簪翠交窗媚榴丹照卷明
大文看虎變小學試蜩鳴
正喜離騷醉光同日月爭

六月

何方能避暑避暑向書牀字挾風霜貴文攜冰雪涼哦
松濤響細漂麥雨飛狂草際螢光滿無煩武子囊

七月

倚梧長把卷一葉忽驚秋巧向句中乞火從篇裏流衆
芳歸玉笈萬寶在金樓若曬空庭腹邊韶合點頭

八月

正是天香節詞場異小山鍾陵歌可和牛渚論難刪雁
過三更後蟲吟萬卷間短檠明月下志士未應閒

九月

是月黃花發家應足濁醪遶籬惟擬古閉戶亦登高獵

野功誰續神倉籍共韜奇書須讀盡豈獨爲題糕

十月

天地不通日惟書道可通三冬開歷朔十月坐春風龍
戰元黃野蜃嘘山海宮奇文驚變化已在簡編中

十一月

暢月稱名久非書暢曷名翰音能共語盍且不須鳴添
線工同積飛灰律已更閒登西閣上正喜綠芸生

十二月

日月俱窮處難窮獨有書人皆輕八蜡我自惜三餘雪
映眸逾炯冰堅腹豈虛梅花天地外此樂更何如

十二月讀書樂詩創自蔗園董子和者如林余不免
見獵效顰遂得五律如數其摘詞琢句亦不過老生
常談但字字帖切本月禁絕泛套游移豈王侍中所
云臣于數子亦有一日之長者耶請以就正大方庶
或有以益我

九煙自識

遊南嶽丹霞寺

只從天半領精神自古名山亦待人五嶽今纔遊一角
百年吾已歷三旬收回南北東西眼閱盡羲農虞夏春
他日山僧應問訊谿光雲響記閒身

有感

此身何故落瀟湘
悶對長天淚幾行
山水無緣供酒碗
文章多病惱詩囊
人情祇向黃金熱
世法誰容白眼狂
明日扁舟吳越去
從渠自作夜郎王

平山春望

春風萬里客登臺
平楚蒼然霽色開
百雉似連孤塔涌
羣峯欲渡大江來
生前富貴楊塵笑
亂後文章庾信哀
滿眼煙花今古夢
天荒地老獨徘徊

客中過西湖見吳岳子卞元文詩步韻寫懷

繇來絳灌本無文
雙掌休誇將相紋
騷壘螭弧容我建
醉鄉茅土許誰分
齋前合置支離叟
宅畔何妨眞漢君

歷遍九州芳草綠卜居詹尹竟何云

己丑過西湖見吳岳子卜元文詩步韻寫懷

辛苦傭書更鬻文雲雷心熱博山紋恩讐國士憑三尺
長短鄰姝較一分麝栗歌殘呼朔客琵琶絃斷咽明君
花前痛哭林間笑此日吞聲不復云

贈簡在雍

放我雙眸混沌前文章多在女媧天精神自古歸三楚
湖海何人不十年懷有異書爭日月心將良友當山川
湘煙歷歷皆花氣共汝徘徊澹蕩邊

傲居

天空海闊竟何如此日高人且傲居擊筑市中誰進酒
賃春廡下自鈔書一春風雨牛衣老十載江湖馬肆虛
輸卻雲門行腳漢竹烟松月總精廬

秋日與杜子皇過高座寺登雨花臺

披髮何時下大荒河山舉目共淒涼客來古寺談秋雨
天爲幽人駐夕陽去國屈原終悻直無家李白只佯狂
百年多少憑高淚每到西風灑幾行

秋日獨登觀象臺故宮及功臣廟一帶遺址

獨來獨往意何如羈客心孤意不孤落日河山千古在
秋風天地一人無英雄感慨麒麟閣神鬼睥睨燕雀湖

高處不須搔首問碧翁大事久糊塗

過辰龍關

千重山過萬重山一線羊腸一線關至此始知無鴈度
勞生不道與猿攀憑陵身出飛雲上指顧詩成落照間
天子黎元歸一統五溪南去莫稱蠻

次韻村居

酷似江南紅葉村稻花千頃帶雲屯沿堤雨後還栽柳
是水春來盡繞門芳草烟中蝴蝶夢曉風枝上杜鵑魂
殘生只可銷閑事望徧歸鴉日又昏

余自癸丑歲有選詩之咏忽忽又數載矣至己未

之春館於岑山程子齋中因從事斯役於是先成
唐詩快十六卷復笑咏四首識之

驚天泣鬼更移人生面重開淨掃塵詩賦有時還復古
風騷此日似懷新儻來富貴眞無謂不朽文章定有神
萬丈焰光千古事眼前譽謗總休論

天人鬼物豈相同同屬情田性海中草木禽魚情可化
日星河嶽性皆通盛衰理一非關理正變風殊總是風
解得別才兼別趣唐詩終古在虛空

生來誦法素王編寢食葩壇七十年敦厚溫柔皆似此
興觀羣怨豈徒然風流合讓唐人占忠孝還從魯國傳

說到移人無不有何須問鬼復阿天

鬼泣天驚半信疑移人人豈不堪移代無初晚惟求快
格有高卑畧過奇十六卷中吾自苦百千年後世應知
此書若問何時歇直到乾坤混沌時

瓦寺愁坐同允康賦

黃金紅粉未銷愁野寺相逢只敝裘舉目河山千古淚
對牀風雨兩人秋時危家破憐張儉地老天荒笑馬周
赤白洪崖齊拍手誰人客帳夢封侯

九日飲翁季霖春草亭

問奇纔過子雲廬春草相思十載餘小隱湖山堪獨步

大文天地欲全舒

時翁方撰
具區志

持螯九日成佳話把酒千

秋見異書若得素心晨夕共析疑欣賞更何如

次韻答贈喻非指

漫說功名薄漢唐何如六月臥義皇連牀野竹千峯翠
繞屋名花萬卷香詩伯饑寒憐杜曲酒徒落魄怪高陽
相逢且結隆中侶笑看他年八百桑

題宗定九新柳堂

如將韻友列山扉晨夕琴樽願不違月下王恭眞濯濯
風前張緒故依依香熏小像鵑初語影落空梁燕乍歸
隔戶長條休挽斷宮腰著意護書幃

題劉正少次山樓

眞似移家向瀼濱太初風月好爲隣漫郎自是名山侶
聲叟應非近代人百尺樓高龍獨臥數峯江澹鶴相親
題詩五嶽知君志嵐谷先分石室春

賦得月湧大江流

蒼茫灝氣戰空明灩灩流光月有聲山水皎然秋萬里
文章奇絕夜三更影迷烏鵲身難定響落魚龍夢亦驚
無限客心悲木末沙鷗天地一舟橫

咏牡丹

名葩爛漫關新粧酣咏身如到雒陽金粉百年眞富貴

丹青三月大文章天分豔色皆殊色國是奇香異衆香
美酒妖姬難乞供願將綵筆事花王

觀音蓮

一瓣亭亭儼雪龕千紅萬紫見應慙誰知東土芬陀利
卽是西方優鉢曇質似芙蓉惟獨立香非簷蔔畧同參
百年一現何容易試問瑤姬可得簪

官舫卽席贈小姬掌仙

姬原名葵英
余爲更之

如見仙仙掌上身芳名去故亦懷新夢維巫峽雲猶怯
花出揚州月欲顰金屋三千誰共夜酒壚十五正宜春
天涇片舫郵亭似醉後何妨擁維神

次韻贈澹生女史

玉人何用識金銀
湘水巫雲好作鄰
橋畔春風身是薛
樓中曉日氏爲秦
綺琴應伴芙蓉麗
錦字休封豆蔻辛
惆悵三年陽羨別
東牆可否再窺臣

友人以瓷鞋杯行酒
宛然纖纖一瓣因
向座客徵詩約字
字帖切瓷杯不得移
入眞鞋座客多閣筆
余漫成六首

誰琢瓊筵月一弓
渾疑響屐墮吳宮
高擎便欲臨頤畔
細酌還堪舞掌中
暖玉滿浮雲液白
眞珠微滴鳳頭紅
莫言瓦缶無風味
醉倒金蓮勝碧筒

靜夜傳香愛素瓷製成巧匠惹相思生花未許潘妃著
承露應教漢帝持玉椀但盛紅琥珀春雲誰裏碧琉璃
酒人願化陶家土合共淵明化履絲

勸飲曾窺纖指痕屈卮爭似此銷魂四香捧足宜蓮印
七寶同心勝桂樽量大翻嫌金葉小酒寒應想玉跌溫
若將繡履評高下輸卻雕盤鄭重恩

漫向雲端比宵娘盈盈三寸笑瑤觴杯傾白墮元同色
玉瀉黃流別有香蓮瓣慣看凝瑪瑙桃絲遙擬寄鴛鴦
雖非裙底淩波物醉想淩波興更狂

纔說纖鉤便可憐青絲未勝縹緗妍神飛霜屐鴉頭外

心醉霞觴鳳唼邊仙掌漫教移別殿
披鞋何必卸當筵
定州正是甄妃里莫羨臨邛大邑堅

想像弓彎製自佳休論官汝與哥柴
一鉤引興非羅襪
三寸銷魂卽錦鞋蓮葉黃金羞學步
花資紅玉愛投懷
甯封若遣爲陶正不屬軒轅屬女媧

九煙先生遺集卷四目錄

古今體詩

瀟湘八景八首

并序以下雜體

合咏八景二首

又七絕一首

又五律一首

又長短句一首

西湖竹枝詞和楊廉夫韻

以下七絕

樓前垂絲海棠

爲友人題畫冊二首

友人索竹溪艸堂詩因集唐句四首遺之

和吳中羈婦趙雪華

和楚女詩十首

并序

附楚女原作

夢得楚女姓名一首

并序

妄得楚女姓名四首

并序

眞得楚女姓名六首

并序

昔長沙陳太守以驛梅驚別意堤柳黯離愁十字

爲離合體絕句余因戲作閨怨十首

無題二首

癡情三首

并序

偶作春閨集句

千春一恨集唐六十首

并序

附絕命詩題詞

黃岡杜濬撰

九煙先生遺集卷四

湘鄉後學左仁清石

湘潭族孫周詒樸子堅

全校刊

古今體詩

瀟湘八景八首

并序

瀟湘八景臺爲宋嘉祐時築詞人題咏甚多大抵皆
從畫屏間摹寫耳余聚族於斯睹聞頗真適魏塘友
人以是題索咏遂倣歐蘇禁體漫賦八章貽之

瀟湘夜雨

楚雲何意溼芳汀
浙瀝中宵未易停
酒醒忽驚千里夢

曲終難覓數峯青潤添蘭晚香先到怨入筠斑淚共零
最是秋聲敲客舫離騷點點不堪聽

洞庭秋月

湖光浮盡岳陽天桂魄當空更悄然三萬頃中鋪縞練
五千里外想嬋娟影迷牛斗槎難泛夢破魚龍鏡自懸
笑指君山如苻藻冰壺何礙挾飛仙

平沙落雁

楚江秋色正銷魂何處賓鴻下遠村豈爲稻梁辭朔漠
欲同蘭芷宿黃昏雲霞黯黯書無字洲渚粼粼篆有痕
咫尺衡陽聲斷否揮絃好入曲中論

遠浦歸帆

第一湘衡好畫圖山開九面面難摹誰攀雲嶺千重樹
閒閱煙波十幅蒲鼓櫂白衣休借問依樓翠袖欲遙呼
往來湖海年年客得似江潭釣叟無

漁邨夕照

三閭曾見咏蒼蒼可是蒹葭此一方樹樹人煙圍野色
家家魚網掛斜陽國同鷗鷺無苛吏代似羲皇近醉鄉
誰道桃源真隔世桃源元只在瀟湘

煙寺晚鐘

六朝何地少精藍清絕湖南勝海南石馬嘶時僧閉戶

銅鯨吼處佛依龕三千界向雲中隱百八聲宜月下參
閒愛翠微橫杳靄幽尋豈是爲瞿曇

山市晴嵐

山市乃山間雲氣蒸變如海市之類非墟市也

蜃樓爭詫海門東此處奇峯迥不同天雨乍收朝霧後
人家都在旭光中金銀氣眩千巖麗龍虎雲疑七國雄
誰信湘南培塿地舉頭縹緲似瑤宮

江天暮雪

六出飛花未是奇卻因湘浦弄幽姿都從米芾高寒畫
散作王維澹遠詩釣罷漁簑收艇後醉歸驢背叩門時
不知溪閣騷人筆評到疏梅第幾枝

合咏八景二首

瀟湘斜遶洞庭南
夜雨澄秋月滿潭
煙寺鐘微收夕照
江天雪霽見晴嵐
帆歸遠浦漁邨暗
市接平沙雁陣酣
八景臺邊都咏遍
千秋名勝幾人探

洞庭瀟水合西流
沙市溪村景色幽
雨暗鐘殘多入夜
月明雁落正宜秋
曉煙寺帶晴嵐爽
夕照帆歸晚浦愁
最愛江山平遠處
滿天暮雪一漁舟

又七絕一首

瀟湘煙雨晚鐘稀
村市晴嵐夕照暉
暮雪江沙看雁落
洞庭秋月遠帆歸

又五律一首

洞天嵐翠合暮夜遠鐘聲帆落煙汀夕漁歸雪浦晴村
庭寒月照沙市晚江平秋雨湘山寺瀟瀟雁滿城

又長短句一首

沙市江天夜村嵐暮雪晴晚鐘秋月寺夕照遠山平雁
落瀟湘漁浦帆歸煙雨洞庭

西湖竹枝詞三首和楊廉夫韻

陂陀葛嶺久淒涼舊是驕奢宰相莊節用愛人猶勒石
可憐蟋蟀半閒堂

競向西湖咏竹枝廉夫可是殢情癡我來恥和儂郎句

要唱江東鐵板詞

山川不朽仗英雄
浩氣能排岱嶽松
岳少保同于少保
南高峯對北高峯

樓前垂絲海棠

分明妃子醉深簾
倦態絲絲睡未厭
豔到海棠真第一
千紅萬紫是無鹽

爲友人題畫冊二首

一片蒼寒臥看宜
知爲風雨欲來時
南朝四百八何處
猶見浮圖影似錐

偶將醉墨潑春潏
約畧閒情遠近間
盡把六朝花艸根

一齊分付米家山

友人索竹溪艸堂詩因集唐句四首遺之

召平瓜地接吾廬
懶性從來水竹居
案有黃庭樽有酒
白雲長釣五溪魚

百花潭水卽滄浪
水國蒹葭夜有霜
聞道欲來相問訊
隔溪遙見舊書堂

芙蓉開在臥牀前
蝦菜忘歸范蠡船
獨立衡門秋水闊
萬條寒玉一溪煙

碧天如水夜雲輕
竹影當窗亂月明
一片揚州五湖白
蘆花深處聽秋聲

和吳中羈婦趙雪華

遺墨郵亭淚血頻
好從句裏信眞眞
文人無貌猶慙福
何況文人是美人

和楚女詩十首

并序

楚女初不知姓名
邑里有燕客游於楚者
云甲午之夏
此女遭兵掠至漢江
赴水死其屍逆流千里
越洞庭湖而南
爲漁人所獲
玉貌如生
年可十四五
有素帨繫左臂
甚固
發視得詩十首
人爭傳寫
遂達金陵
余得之於林子扇頭
讀其詩
咸意爲湘江女子也
秋燈蕭颯倚韻和之
頌歎誅歎愧深於慚

長夜綿綿未五更荒天老地盡愁城誰傳十首湘娥怨
一夕千秋萬感生

嬌羞會未識公姑天枉空憐反哺烏孝烈名香真不朽
須知生女勝淳于

孤竹文山是弟兄奸雄聞此定心驚湘娥雖死何曾死
蜍志當年本不生

誰人敢勸易羅衣萬丈洪濤撒手歸卻笑黑江何見晚
琵琶空自惜明妃

字字分明正氣歌光爭日月豈須多春蘭秋菊哀終古
還勝投詩贈汨羅

玉折蘭摧此一時隨光正則是吾師江潭漁父非漁父
帝遣神收絕命辭

委蛻千秋卽異珍貞魂豈復滯江濱天龍八部齊驚拜
箇是文章節義身

萬劫眞容儼未笄汗青重見女夷齊鬼神但識西山事
此是西山又向西

只宜讚歎不宜悲如載元非卓氏眉千里逆流生氣壯
皇天后土可曾知

幾多忠孝殉君親造物於今頗不仁眼見珠沈連玉碎
癡頑長樂是何人

附楚女原作

家鄉一別已春更此日含羞到漢城忽下將軍搜括
令教人尙敢惜餘生

征帆又說過雙姑掩淚聲聲聽夜烏葬入江魚波底
沒不留青塚在單于

骨肉輕離弟與兄孤身千里夢常驚歸魂願返家園
路報到雙親已不生

遮身還是舊羅衣夢到瀟湘何日歸遠涉風濤誰作
伴深深遙祝兩靈妃

厭聽孤兒帶笑歌幾回腸斷嶺猿多青鸞有意隨王

母空使人間設網羅

生小伶仃畫閣時詩書曾把母兄師
濤聲夜夜悲何極猶記挑燈讀楚辭

當時閨閣惜如珍何事流離逐水濱
寄語雙親休眷戀入江猶是女兒身

生來誰惜未簪笄身沒狂瀾歎不齊
河伯有靈憐薄命東流直繞洞庭西

照影江干不盡悲永辭鸞鏡斂雙眉
朱門空說諧秦晉死後相逢未可知

圖史當年強解親殺身從古羨成仁
簪纓雖愧奇男

子猶勝於今共事人

夢得楚女姓名一首

并序

余既和楚女十詩矣終恨其姓氏無傳嘗與林子謀請於此仙而不得至仲冬長至夜夢與數友閒談偶詢及此女姓字一友遽答云姓李余亦唯唯傍一友云君言謬矣此女自姓盧名佛蓮余不覺恍然因援筆就案書盧佛蓮三字此友復言佛字非是乃上从竹頭者余諦思竹部諸字佛音殊少或是筏字之譌遂復註筏字於傍兩義並存此友無語醒而異之紀以一詩自此楚女無姓字而有姓字矣

寶筏蓮臺佛國遊
姍姍甲帳豈堪儔
湘江水月身重現
不是當年舊莫愁

妄得楚女姓名四首

并序

甲午之冬余旣夢得楚女姓名矣此衷遂已釋然至
乙未春日忽有林生鳳鳴過鵲江生爲楚之安陸人
適友人談及楚女事生云此吾同里黃氏閨媛也其
尊人諱以泰爲鄉先達女小字青蓮因避亂僑居長
沙之益陽突遭兵掠赴江盡節前所傳一一不妄但
十詩題油楮上非素帨詩中所云母兄者則母之長
兄某女幼所師事者也余聞之快然因復作四絕識

之至戊戌冬晤衡陽徐
生乃知此言之妄

纔得貞姬姓字傳騷魂半載爲誰牽神仙只向蓬萊覓
豈識西方九品蓮

謫仙畸號偶同行夢裏先偷一字名更訝無端聯氏族
恰如許渾對飛瓊

守禮應知出大家文章彤管豈勝誇人間生女能如此
愧殺蘭堦玉樹斜

三楚精神屈宋魂離騷日月至今存繇來湏女非湘女
雲夢從今不敢吞

眞得楚女姓名六首 并序

乙未之春聞安陸林生言咸以楚女爲黃青蓮矣越
三載戊戌冬偶晤衡陽徐生於鳩茲復談及此徐生
慘然曰此吾妹也以甲午春在衡州被掠至漢江赴
水死死時留十詩於紙適見擔水童子乃抽銀釵并
詩授之屬云煩寄與讀書相公童子以呈其主人瞿
生遂盛傳於武昌藩臬聞之遣人順流收其屍不獲
因礮碑鐫十詩其上植之漢陽門外余問女年幾何
曰十三曾許字否曰許字王氏女何名曰青鸞卽詩
中所謂青鸞有意隨王母者也余聞之亦慘然蓋徐
生之父立階爲楚丙子孝廉第六人曾與余有舊以

女故亦憤鬱而死云噫一楚女姓名也初夢得之旣
妄得之至是始得其眞焉乃繇佛蓮而青蓮繇青蓮
而青鸞若郵遞然亦奇矣因復爲六詩識之雖然泡
影何常余惡知林之果妄徐之果眞耶又惡知夢之
非眞眞之非夢耶尙俟他日過方城漢水而問之

吳楚乾坤倏不同祝融粉碎洞庭空那知萬古貞魂宅
卻在湘帆九面中

亂離誰問孝廉船絳帳旂裘各一天痛殺文姬生死別
從今休拂四條絃

青鸞王母是前因漚槿塵緣總未眞環珮若歸明月夜

應隨南嶽魏夫人

幾行清淚漲瀟湘花落黃陵更斷腸
從道峯高無雁到化爲精衛過衡陽

天遣奚童表孝貞讀書種子定鍾情
脫簪瀕死殷勤屬祇爲高堂不爲名

千秋墮淚說遺蹤片石今看矗女宗
漫道朱陵峯七二直應添作七三峯

昔長沙陳太守以驛梅驚別意堤柳黯離愁
十字爲離合體絕句余因戲作閨怨十首

馬蹄偏喜遶天涯四海爲家豈是家
幸遇故人歡樂否

驛亭何處醉黃花

木葉寒砧遠戍悲人間那得萬回兒母嗟予季疲行役
梅嶺榆關總未知

苟全性命愛茅廬文武勲名恐未如馬上泥金知是否
驚呼小玉問家書

口舌經年費揣摩力田刺繡枉蹉跎刀頭夜夜懸明月
別淚何堪付逝波

立盡斜陽望盡雲日長香篆冷殘熏心中祇是憐夫婿
意外何曾夢使君

土風到處入斯篇日近長安自杳然正練吳門空極目

堤邊艸色只連天

十年湖海盍歸歟八月幽風樂有餘
卯酒午餐聊共慰
柳陰贏得狎樵漁

黑貂零落泣王孫立馬千門月影昏
日日登高勞遠望
黯然何處不銷魂

凶吉難憑卜筮偕內爻應勝外爻
乖佳人自是無心緒
離坎當中卻倒排

禾黍秋風念異鄉火流又促授衣忙
心心欲織迴文寄
愁見梧桐墜曉霜

無題二首

酷似江東大小喬縱無珠翠也妖嬈若教賜浴溫泉水
粉膩脂香玉兩條

湘竹娥英對倚簾林風閨秀似鶉鶉家常粧束渾閒事
難得淩波一樣纖

癡情三首 并序

偶與二友同舟一友暢談時事及余余曰吾素無名
利之想但生平有三恨一無知己二無奇緣今但願
得遇一文君足矣一友笑曰世間甯有老相如余曰
又安知無老文君耶友曰公真情癡也余卽笑吟云
底事情癡癡不了癡情猶望老文君因戲成三絕以

識斯語

癡情猶望老文君半世求鳳四海聞但得芙蓉脂肉好
何妨眉黛遜春雲

四十年來夢雨雲癡情猶望老文君鸛裘慣鼻都休道
只愛琴臺舊嫁裙

風流學士俊參軍騷壘端餘百戰勲莫笑長卿終四壁
癡情猶望老文君

偶作春閨集句

金縷濃熏百和香困人天氣日初長幽窗漫結相思夢
睡起楊花滿繡牀

千春一恨集唐六十首

并序

千春一恨者思彼美而不得也彼美伊誰蓋出於某
王孫之家而衆人畜之者也某與王孫同避亂福唐
西陳村見而慕之王孫固夙稱交好者初慨許持贈
旣而負約百計求之益堅祕爲奇貨某無可柰何屢
集唐句相貽冀其一悟乃王孫頑很自若不成報章
某悵恨經旬因與王孫訣別移寓東滌自此彼美音
容杳然判若隔世矣每五夜徬徨拊枕咄咄因思昔
人所云英雄如項籍而不得天下高才如杜默而不
得一第今風流俊逸如某而不得彼美此三恨者真

堪鼎足千古雖然某湖海元龍生平奇遇較多亦安
可少此一恨所可慨者王孫之不仁而彼美之薄命
耳中懷崢嶸久不能平因漫次前後所集唐人語共
得絕句六十首藏之名山傳之後世以告天上人間
千秋萬古之情癡詩人如某者

初集十首

芙蓉如面柳如眉盡日含毫有所思惆悵春歸留不得
曉鶯啼斷綠楊枝

清歌妙舞落花前夫子紅顏我少年若問玉人殊易識
娉婷十五勝天仙

天下能歌御史娘等閒教見小兒郎無情不似多情苦
擬託良媒亦自傷

白日姮娥旱地蓮當時求夢不會眠人生豈得長無謂
閒過春風六六年

門前初下七香車二月中旬已破瓜不管相思人老盡
隔江猶唱後庭花

上清仙子玉童顏只許含情背後看但使主人能醉客
一生長對水晶槃

一寸相思一寸灰落花流水認天台由來此貨稱難得
不踏金蓮不肯來

道是無情卻有情千金莫惜旱蓮生
兒童不識冲天物惡說南風五兩輕

朧朧樹色隱昭陽不辨花叢暗辨香
誰謂此中難可到盡知三十六鴛鴦

一月主人笑幾回更逢山上一花開
薜蘿亦是王孫草嫁與春風不用媒

再集二十首

南宮風月寫難成一笑從教下蔡傾
從此不知蘭麝貴內家叢裏獨分明

分付新聲與順郎一枝濃豔露凝香
佳人已屬沙吒利

惱亂蘇州刺史腸

三十無家作路人樓前相望不相親
桃花流水深千尺願得乘槎一問津

鈿暈羅衫色似煙妖童寶馬鐵連錢
十年南北看燕趙半採紅蓮半白蓮

玉釵斜壓鬢雲鬆人面桃花相映紅
若使春風會人意世間應不要春風

淚溼羅巾夢不成信知尤物必牽情
春宵苦短日高起卻是劉楨坐到明

清潤潘郎玉不如枇杷花下閉門居
黃姑阿母能拚剖

歌舞閒時教讀書

髣髴聞香不是香
風嬌小葉學娥粧
遙知楊柳是門處
隔得盧家白玉堂

夢來何處更爲雲
忽到窗前疑是君
玉樹後庭花一曲
人間能得幾回聞

盡日無人屬阿誰
阿誰曾似與嬌癡
也應攀折他人手
何不相逢未嫁時

可愛深紅愛淺紅
野花黃蝶領春風
玉童私地誇書札
一片西飛一片東

紅衣落盡暗香殘
幾許幽情欲話難
憶得雙文衫子薄

玉容寂寞淚闌干

獨悲孤鶴在人羣
夢遶巫山一片雲
聞說春來倍惆悵
錦衾深愧卓文君

春色先歸十二樓
玉釵恩重獨生愁
何時共翦西窗燭
斜倚紅鸞笑不休

且將團扇暫徘徊
林下輕風待落梅
一種蛾眉明月夜
夜深誰共阿憐來

一生閒坐枉傷神
定子當筵睡臉新
聞道欲來相問訊
爲持金錄救生人

莫送春風入客衣
眼前珠翠與心違
何如買取猧獃弄

任汝三彭說是非

碧玉今時鬪麗華
豈宜重問後庭花
秦宮一生花底活
願君且宿黃公家

一場春夢不分明
分付鶯花與後生
莫怪當歡卻惆悵
人生難免是深情

花恨紅腮柳恨眉
相思無路莫相思
相思相見知何日
此恨綿綿無盡期

三集三十首

名花傾國兩相歡
犀辟塵埃玉辟寒
我有迷魂招不得
莫教長袖倚闌干

淫雲如夢雨如塵愁思看春不當春難得相逢容易別
可能都是不如人

花壓闌干春晝長阿侯繫錦覓周郎東風不與周郎便
雲雨巫山枉斷腸

耿耿星河欲曙天月明橋上看神仙無情有恨何人見
卻遶迴廊又獨眠

銅雀春深鎖二喬玉人何處教吹簫卻嫌脂粉汙顏色
願作輕羅著細腰

傾國傾城總絕倫全家羅襪起秋塵無情最是臺城柳
不解迎人只送人

露桃花下不知秋何處相思明月樓第一莫嫌才地薄
年初十五最風流

知君書記本翩翩疊在空箱得幾年不分桃花紅勝錦
王孫艸色正如煙

枝枝交影鎖長門虛負賢侯鄭重恩桃葉含情竹枝怨
月明花落又黃昏

不把雙蛾鬪畫長柳花偏打內家香丈夫飄蕩今如此
合是狂時不得狂

宵分獨坐到天明南斗闌干北斗橫若見紅兒夜深態
沈香火底坐吹笙

紅袖香銷二十年一身憔悴對花眠何因得覓眞珠履
白日將升第九天

滿堂絲竹爲君愁人自傷心水自流願得侍兒爲道意
與君同上景陽樓

芙蓉脂肉綠雲鬢花態嬌羞月態閒莫向樽前奏花落
對君衫袖淚痕斑

憔悴支離爲憶君江花亂點雪紛紛思量卻是無情樹
半入江風半入雲

樹頭樹底覓殘紅踏閣攀林恨不同世上悠悠安足論
明朝歸去事猿公

逐隊尋行二十春與君相見卽相親相逢不用頻迴避
同是天涯淪落人

紅裙妒殺石榴花海燕西飛白日斜不信比來長下淚
越羅衫上有紅霞

南方應有未招魂金屋無人見淚痕天若有情天亦老
巫咸不下問銜冤

不將清瑟理霓裳半是思郎半恨郎取次花叢懶迴顧
後園青草任他長

芳草何年恨始休夕陽西下水東流一生幾許傷心事
欲采蘋花不自由

卻恨青娥誤少年狂歌痛哭酒樽前
得成比目何辭死
天子呼來不上船

可憐春半不還家寒食東風御柳斜
繫得王孫歸意切
一羣嬌鳥共啼花

小白長紅越女腮無人不道看花回
可憐夜半虛前席
不賜金莖露一杯

羨爾城頭姑射山破瓜年紀百花顏
由來絕色稱難得
世上浮名好是閒

休言芳槿一朝新不擬教人哭此身
能以精誠致魂魄
也應休憶李夫人

偷眼蜻蜓避伯勞黃鸝枝上啄櫻桃誰能更把閒心力
幻出文君與薛濤

劍逐驚波玉委塵岸傍桃李爲誰春仰天大笑出門去
從此蕭郎是路人

此身漂泊苦西東十載青娥不負公玉樹九重長在夢
定知難見一生中

粧成掩泣欲行雲荀令香爐可待熏別後相思隔煙水
不知何處再逢君

絕命詩題詞

原詩
已佚

佛氏戒瞋良爲道眼不開瓊屑細故與夫已實理細妄
動無明者言耳若夫事至宏鉅名節所關人禽之界而
亦復不瞋則是形骸苟具而藹然無氣古今無氣之人
莫如馮道留夢炎而可以爲法乎吾與老友故戶部周
九煙先生蓋深惡之而瞋益日甚至於無終食之間違
瞋以此取憎於世以致困窮危殆弗顧也然吾之瞋僅
託諸空言而九煙之瞋則見諸實事觀其無故沈淵無
病辭世非實事乎蓋積瞋有年而發揮於一旦世人但
見其粹然而不知其所以然宜其反指醒人爲醉而不

自覺其如泥也可哀也矣今讀其絕命詩二章其首章
固已自明其瞋之故次章直欲與三閭大夫方駕齊驅
豈欺我哉夫一部離騷經緣瞋而作也故屈子不瞋則
無離騷由是武侯不瞋則無出師表張睢陽不瞋則無
軍城間笛之詩文文山以瞋故有衣帶銘正氣歌謝疊
山以瞋故有卻聘書九煙猶是也蓋瞋者生氣故九煙
不死不瞋無氣故若輩不生世有我輩人不可以不辨
此皆疇昔之日與九煙互相砥礪之概至是其令子櫛
字禹公者過訪出一詩再拜以爲先人知己同調莫踰
老僕請識數語遂書此意歸之禹公負才有志能終身

無改於父之道乎則可謂孝矣乙丑陽月黃岡杜濬題
於金陵流寓之再造草堂

先君目空一世獨推先生爲勝已今觀先君之不朽
得先生是文而益光益信其推服之誠此小子所以
感泣百拜蒲伏而不能起也

櫛識